

安雅堂未刻稿

安雅堂未刻稿卷第四

萊陽 宋 琬 玉叔 著

七言律詩

東昌守剛候陳階六舟不至 二首

雙旌先後出王畿豈謂檣鳥咫尺違
敢道朝廷疎汲黯共推經濟屬胡威
鴈回瘴海梅花發客散燕山諫草稀
何日銜杯話疇昔鶴鶴原上倍霑衣

詎爲西風阻石尤朝朝暮暮此淹留
孤槎如在黃牛峽有客相望青雀舟
河伯有心欺放逐布帆無恙任沉浮
任城一葦須卽友痛飲高歌李白樓

世祖章皇帝輓詩十章

聖主龍飛北極天
白旄黃鉞掃幽燕
功同軒后陳師日
齒讓神堯踐祚年
負屐圖成朝萬國
關門詔下策羣賢
烏號忽報宮車晚
望斷蒼梧淚泫然

長安馳道接榆關
萬里邊亭斥堠間
湯沐重開元菟郡
旌旗旋指碧雞山
方聞鳳輦回中禁
何意龍輶去不還
臣在薊門曾伏謁
翠華咫尺見天顏

已亥十一月
駕幸三屯臣琬伏

謁道左蒙
天語垂問者再

錫類由來徧八荒
君王至孝格穹蒼
南郊薦璧天重旦
長樂稱觴夜未央
誓御尚衣多浣濯
慈幃珍膳必親嘗

升遐倍切柝棬恨遺詔悲涼淚萬行

千官縞素哭長楸聞道園陵禮數優
斑竹未傾湘女淚
碧梧先落漢宮愁
依稀環珮帷中見
縹緲衣冠月出游
此日橋山真萬里
何人扈葬鳳凰樓

戎衣一著奠皇輿
訪道臨雍草昧初
玉簡盡歸天祿閣
牙籤長啟茂陵書
蛟龍刻篆傳荒徼
蛟蝶丹青賜婕妤
珍重詞臣蒙大賚
須知尺素抵璠璣

講武時臨五柞宮
泱泱洛水賦車攻
蠻方道遠輸馴象
別館春深出射熊
羽獵歸來誇土苑
橫汾歌罷起秋風
傷心彌望昆明外
輦路蕭蕭蔓草中

桓桓諸將盡熊羆
決策寧誇六出奇
孫皓來歸蒙爵土
盧循何敢抗王師
珠崖銅柱車書遠
瘴海樓船羽檄遲
南顧殷憂頻按劍
彌留猶復念瘡痍

復辟當年入紫微
太阿獨攬肅天威
元言漸欲窮三竺

大政何曾廢萬機
丞相共推周勃慙
逐臣新放蔡邕歸

賜李吉津詹事自戍救還

自憐糞土餘生在
淚灑朝元舊賜衣

琬丙申濫

卓異 賜蟒袍一襲 欽

居庸東枕漢家樵
牧年來帶劍登
自灑宸章移象輅
親封隧道問魚燈
祠官備物增新額
野老扶筇痛撫膺
琬管千秋書盛事
那堪風雨泣金滕

蓋輿遽輟紫宸朝顧命殷勤簡大僚
丞冊元良安社稷更聞哀痛罷征徭
萬年江漢宗溟渤五夜星辰望斗杓
寄語羣公須努力時艱莫惜羽脩脩

癸卯元旦

余年五十

一載囊頭請室中驚看斗柄又臨東
浮生可號知非子怪事皆云亡是公
摩詰老來惟懺佛殷生愁絕獨書空
五更自拭沾巾血錯認辛盤燭淚紅

白髭

病起新添數白髭自憐形影漫嗟咨
趨炎不上江郎頰欲涅還愁墨翟絲
青鏡久辭還任長赭衣爲伍恰相宜

銜杯問汝來何晚伴我霜眠雪臥時

談長益以詩過唁次韻

湖上吞聲成死別望門止止竟何投家如驟雨浮萍散
身似經霜病葉留梁獄書成人已老薊門花落客重游
欲知鄒衍呼天處驗取蕭蕭雪滿頭

程爾瞻以祁奕喜之難到京相問未幾祁得遠戍
程送之出關南歸造別賦贈一首

愁絕偏增一黯然君行我住似枯禪流人自昔哀亭伯
高義於今有仲連鴻鴈能將遼海淚鱸魚堪羨鏡湖船
到來諸阮如相問河上悲歌倍可憐

送長益之周中丞幕府二首

憲府霜輅出鳳池二東人賦袞衣詩主逢陶侃才方展
座有王珣喜可知需罷繭絲哀杼軸丞除薤 問狐狸
預磨一片徂徠石早晚封巒好勒碑

曾爲東道三年別何意南冠萬古冤彈缺不勞歌幸舍
上書無計達天門同袍欲作秦庭哭岐路堪銷楚客魂
百口累卿須付托再生深望主人恩

檢閱故人姜質當遺稿泣然有作

宿草萋萋幾度春招魂不返大江濱安知嗣祖非爲福
況有要離可作鄰良友心期違楚些孤兒風貌是吳人

西風似翦吹殘燭三復遺文淚滿巾

鬻帖

獻之帖二本董文敏用羊毛筆跋其後蓋澄心堂舊帖也

空囊垂敝詎堪茹大令銀鉤劫火餘秘本共傳唐內府
裝池深羨董尚書久拋墨硯柳生肘持換朱提釜中魚
屋漏幾行苔蘚積鵝羣猶似在吾廬

鬻畫

絕代丹青說大癡烟嵐一幅後人師墨痕澹蕩今無恙
神物微茫自有時預擬他年爲殉具那堪此日博晨炊
紛紛輕薄迷真質不忍重看雙淚垂

鬻硯

馬肝之石重端州兩字宣和御墨畱洗濯再經蠶室淚
溫柔三倍雀臺酬虎鬚碎我琉璃匣鵝眼依誰翡翠樓
渾似故交零落盡幾回長歎拂吳鉤

鬻觚

觚有古篆十餘字曰已
父錫汝彝乃商器也

美人贈我古銅瓶篆刻蟲書已父銘雲氣常濛螭腹碧
土花半蝕鴨頭青宜供繡佛施髹几曾伴寒梅插素屏
一別分明同墜井餘生今已類浮萍

鬻鑪

良工絕藝冶師專宣廟香鑪一代傳製異博山春箔外
篆銷沉水夜燈前價廉僅博雕胡米主易愁爲赤仄錢

十載摩挲存手澤
夢魂猶自裊餘烟

鬻字

海岳先生起我飢
赫蹏半紙世間稀
鸞廻鵲顧差能似
澤國山城忍暫違
飛動自形諸蔡拙
風流真覺大蘇肥
一縑一字徒虛耳
售得囊錢僕喜歸

鬻磁盃

秦州隗囂
宮中物

素磁刷自隗囂宮
不與柴官哥定同
泛海每邀明月影
試茶偏愛晚松風
千年磨洗魚龍氣
萬里追隨虎豹叢
此日真同秦岳棄
幾時還遇楚人弓

鬻畫屏

崔子忠畫
川圖二十幅

博陵之裔狂者流繪事依然顧虎頭貌得輞川人已去
渾疑摩詰宅仍畱漆園竹館移三市翠壑蒼巖動五侯
謁遍長安無客賞祇將粉本售吳州

鬻裘

半鞞羊裘尚著身檻車徵後共沉淪寒猶可耐因捐汝
病則相憐敢擇人積毀誰爲五穀贖長愁實甚黑貂貧
商飈轉眼吹絺綌安得義輪只是春

鬻帽

囊頭有木不須冠纓絡蕭蕭色尚丹斗酒且謀阿段醉
北風遑恤孟嘉寒春無白石那能煮坐有青氈取次餐

臣罪伊何憐素髮
主恩萬一敝帷看

秋風聲

瑟瑟寒飈翦素秋
年年驅鴈過蘆溝
吹殘紈扇秦王女
搖蕩橫汾漢帝舟
時送悲笳來北塞
每飄哀笛入西樓
天涯此夜傷心客
縱未從軍亦白頭

秋雨聲

劍閣泥深幸蜀年
淋鈴一曲至今傳
霏霏無奈初長夜
淅淅偏多向曉天
衰柳隄邊驚鷺語
枯荷葉上攪鷗眠
盧家少婦橫波淚
溼盡箜篌十五弦

烏聲

三匝棲鳥夢不安哀鳴啤曉曉寒豈云宕子從軍樂
似訴征人行路難金井轆轤梧乍脫白門樓閣柳初殘
賤臣哭後頭終黑腸斷當年太子丹

鴈聲

桑乾木落葉紛紛嘹唳征鴻不可聞南去黃陵哀帝子
北來青塚哭昭君銜蘆蕭蕭眠沙渚帶雨離離入暮雲
銷盡客魂招未得驚心非獨爲離羣

蟲聲

耿耿雙星隔絳河亂蛩幽怨出平莎美人簾外清商曲
壯士尊前變徵歌爲傍疎燈哀轉劇卻憐明月語偏多

西堂有客中宵坐九辯吟成奈爾何

落葉聲

涼雨清宵鐵騎鳴曉看黃葉滿階平欲飛且止初無定
乍聚還分似有情寒響若爲催去燕春風曾共語流鶯
壯懷無那桓司馬行到江潭感慨生

鐘聲

玉漏丁丁秋未央金鐘杵杵帶微霜千門曙色聞長樂
六代餘聲在景陽紅葉樹搖山寺曉白蘋風裊客船涼
無端只解催殘夢不遣愁人到故鄉

笛聲

千家搗練夜沉沉長笛誰爲出塞音嶺上落梅應駐馬
山陽宿草倍沾襟劉峴北望供長嘯馬援南征多苦心
寄語人間行路者風波多似五溪深

角聲

一更初奏五更終畫角長隨萬里風夜月飄搖沙磧外
曉霜嗚咽戍樓中飛來雨雪嘶邊馬散入川原起塞鴻
解道秋聽殷地發白頭愁殺杜陵翁

砧聲

絡緯催寒共妾啼強將皓腕理雙題葉砧一去聲猶在
刀尺空裁夢已迷風急頻回雲際鴈更長先喚汝南雞

朝逢驛使慙慙寄餘韻悠悠逐馬蹄

三月既望同米吉土小飲翟園逾日雨雪漫成一

首

習池長日鎖莓苔好友追修禊事來春雪暫教畱鴈住
殘生猶得見花開愁中對酒偏能醉老去無家轉自哀
苦憶城南堤上柳杖藜須看百千廻

過米吉土齋中

請室頻過鬢已蒼金雞初下喜如狂澣衣盡掬孤臣淚
翦韭重登君子堂陶令菊花迷舊逕謝家珠樹儼成行
微軀欲伴鴟夷老且買綸竿共爾商

贈胡士林卜士

赭衣纔脫血猶殷此日君恩果放鵬龜策告予無死法
若盧幾客得生還人傳蘇軾埋園土我道京房在世間
咫尺新豐賒酒易下簾一醉碧溪灣

舍姪稼菴小石至京慰問悲喜而作二首

檻車北發踐嚴霜念爾飄搖在豫章十載話來真夢寐
一家人際小滄桑嵇康未死求丹訣阮籍何須哭白楊
見說鄉園親串少沙蟲猿鶴總堪傷

仲容長慟缺生芻驚定銜盃得暫娛上苑鶯花空自好
故園松菊竟何辜豈圖臣室生朱並終是天心屬趙孤

華髮倍憐歸未得營巢來往羨林鳥

葉星期話舊

南冠泣罷渺天涯燕邸逢君感歲華
羈客餘生悲楚獄故人高義頌彭衙
蒨緜誰識張公子彤管猶傳班大家
驢背衝泥山色好雙柑同醉杜陵花

三月上旬酷熱如暑望後忽寒雨雪不止河泮復
冰臥病感異賦呈吉士

窮居漫解子雲嘲乞得醫方手自鈔
一雨人分今舊感三春天似夏秋交
雪隨飛絮霑鶯領冰帶輕泥冷燕巢
已負桃花花欲笑何時驅馬到西郊

代贈張青弇僉憲 二首

萬里昆明洗甲年，帝恩屏翰借才賢。
青驄甫到收蠻雨，紫氣重來捧御筵。
身傍香鑪星北極，功高銅柱日南天。
吾廬近在棠陰下，不必經營陽羨田。

滇南凋敝賦魚赧，自得公來買犢耕。
六詔風清諸葛壘，九黎山接伏波營。
烟消瘴海無鯨浪，春滿盤江有鴈聲。
華髮自憐無寸補，依劉將欲掃柴荆。

雨中飲汪荅文齋中

文章誰復狎齊盟，共說江東陸士衡。
官自左遷忘世法，人從垂死見交情。
小山最愛淮南賦，大雅空慚稷下生。

全宋雅堂詩集卷四
暇日追隨頻載酒看花莫負雨初晴

和米吉土席上卽事作

兀兀春寒擁敝裘索郎元自解醫愁疎狂豈爲吾輩減
姓名久被他人羞俠客醉看金七首嬋娟悞墜玉搔頭
憐君亦是忘機者散髮將尋海上鷗

同汪茗文梁曰緝米紫來慈仁寺看海棠作

維摩室外沙棠樹疑是散花天女移嬌態最憐纔半放
快游不必定前期蝶衣亂舞輕風下鶯語流連夕照時
況有虬松堪徙倚紅霞青籟晚參差

送方邵村歸桐城

甌車猶憶赴辰韓
技血郊原不及餐
一別北梁張儉去
再封三府蔡邕還
盧龍塞外霜鴻絕
鴨綠江深雪窖寒
襪被連牀驚復喜
方知蜀道未爲難

王敬哉先生齋中芍藥盛開招同吉土小飲卽席
爲詩并以畫扇見貽依韻賦荅

曲廊移後認藤蘿
馴鶴招搖一再過
紅葉繞闌因燭豔
青山隨筆覺雲多
驚弦尚憶連牀夢
息壤還徵戴笠歌
絲竹雅宜陪謝傅
璽書佇有到岩阿

賀王玉銘先生補大司寇

帝念臯陶舊股肱
絲綸特簡晉秋卿
關西家世留金鏡

北斗勳名正玉衡
駟馬閭高瞻德里
騶虞幡下起歡聲
已知春滿園扉
草力爲重華廣好生

同堵芬木邵叔虎堵乾三趙浮山牟侯甫泛舟皓

湖分韻四首

湖上秋光斂素烟
行廚泛酒沈寥天
紅衣落盡芙蓉老
黛色遙看睥睨懸
雲去定歸滄海畔
月來疑在剡溪邊
蘆中有客同搖落
坐對羣鷗話昔年

曲港分流界水涯
菱荷如幄影交加
輕搖畫槩衝魚笱
亂點清波有荻花生計
且須營笠子醉歸隨意宿漁家
五湖今日誰堪長
與爾同乘八月槎

朝看宜雨晚宜風西子明粧約略同無盡泉源來地底
一行鴈影落盃中水含密藻添深碧葉隱餘花殿晚紅
苦憶平原舊池館夕陽衰草滿寒空

當年吾黨羨鄒枚醉裏狂登北極臺玉笛重聞人不見
芒鞋無恙客還來欲從楚壁呵天問誰向秦川辯劫灰
此日同君稱六逸杖藜攜手入徂徠

濟上晤堵芬木明府賦詩爲別

甲午解元趙浮
山出於其門

三年羈束已成翁澤畔逢君感慨同豈有故人憐范叔
能知才子屬吳公青山家在堪招隱白雪吟成足愈風
我到春申幽澗裏烹泉相憶月華中

贈別趙浮山解元

滄洲無處寄閒身，短髮猶堪作酒民。
顧我頻年餘涕淚，與君三世共交親。
愁聞鄉國歌黃鳥，佇有文章對白麟。
回首頻看華不注，柳條楓葉倍傷神。

分水廟四首

誰握并刀翦絳河，朝宗千里舳艫過。
龍鱗派別雙歸海，燕尾支分兩注波。
月印碧潭宛轉鏡，櫓搖雪練往來梭。
長菱旣屬神哉沛，不假宣房瓠子歌。

湯湯汶泗此交流，地控中原擁上游。
東野星辰連析木，南天筐篚半揚州。
馮夷自割鴻溝界，孝武空勞白馬裘。

何事楊朱偏涕淚茫茫岐路客心愁

波痕何事界叮哇一曲平分似解鰲堤上柳條爭嫋嫋
岸邊蘆葉共萋萋雨餘蝦蟆雌雄見日落鴛鴦向背迷
爭似狂夫無定準寄書南北誤封題

盤渦中劃縠紋連不借樵風也自便雙疊空明雲母扇
兩頭歌吹木蘭船陽侯誰擅黃池長明月疑從谷浦懸
極目蒼蒼葭莩外不知何處汶陽田

上總河朱太保梅麓先生

二首

神京飛輓仰河隄禹宅司空職貢齊十有二州勞赤舄
八年三過錫元圭安瀾詎見潮如馬保障何勞石作犀

莫向東南憂杼軸捷書今已罷征西

作楫經綸靜有餘上游開府控青徐蒼龍闕下三公履
白馬隄邊太史書鴻鴈哀鳴飛大野龜鼉偃臥護新渠
竭來欲獻宣房頌鈴閣森沉問掃除

任城晤王蘭陔水部畱贈四首

痛哭吳山送纍臣相看惻惻暗沾巾范滂西去無生想
王粲南歸有故人夢裡三千訛已信尊前七尺認方真
足音忽報兒童喜細數煩冤轉欲攀

偶隨征鴈過西軒乍解綈袍意自溫笑插黃花驚我在
能添白髮是君恩移燈欲代秋蟲語翦紙還招客子魂

回首六朝明月夜濁醪一石獨留髡

虛橋垂垂屋角青短籬疎樹草元亭閒眠東閣修花史
坐對南池註水經檻外鴉羣堪卓筆風前鶴子自梳翎
何人偏弄陽關笛別後浮雲此際停

仙郎近拜白雲司四載馳驅帝念茲舊執元圭祠伯禹
新攜丹筆檄馮夷歌成瓠子秋風夕客散桐廊夜雨時
何遜梅花無恙否重吟佳句倍相思

蘭陔新除刑部郎仍貽河

賀房皓如別駕超拜憲副

王師已奏安瀾績聖主方思曲突功武庫從來推杜預
長城今日借韓公早嫻方略輕裘外佇見澄清攬轡中

聞道酬庸猶未已，麒麟繪罷賜彤弓。

簡閭翼望時以考功員外司權清江

東曹先後喜彈冠，使節南行水鏡寒。
啟事從來歸獨座，度支今日重兼官。
香分畫省藤花紫，帆落清淮楓葉丹。
欲逐飛鴻過江去，月波樓上一憑欄。

寄劉雪舫

爰從北寺代呼天，送客魂消死別年。
人向生前曾自祭，詔從江上忽驚傳。
酸風楚雨懷沙賦，白鴈青楓訪戴船。
欲向甓湖尋釣艇，乞君三畝種瓜田。

贈王蒼嵐少叅

二首

烟嵐罨畫喜重過山木之枝越客歌人向江東依謝尚
君能度外置廉頗笙吹緱嶺千年鶴霞起天台萬點螺
暇日登臨多散帙玉山清映鏡湖波

檐帷先後駐江臯共羨君侯有佩刀越國山川風自古
梁園詞賦客偏豪樽前白苧迴銀燭篋裡黃庭續綵毫
欲訪石梁先盡醉情深不獨爲綈袍

乙巳初春同仲昭斗酒鄴仙諸子看梅永興寺信
步造訪陸元見卷阿隱居歡然命酌是夜遂宿齋
中賦詩俾諸子和兼訂再游之約四首

久從甫里羨遺民避地甘同虎豹鄰竹裏維舟朝出釣

籬邊劒筍夜畱賓一簾松影元堪臥百樹梅花自不貧
已被馬蹄知野逕看山莫厭往來頻

高人應有栽花福客子原因踏月來明月欲出不肯出
梅花已開猶未開戶庭雖朴能容榻名姓纔通輒舉杯
閒逐村童競簫鼓呼兒更爲發新醅

幽篁裊裊覆清渠安道何年此卜居棋局移來驚樾鳥
盤餐供罷減溪魚尋僧老入蓮華社課子家傳未耜書
鐘梵隔林清夢接果然高枕似吾廬

高話繩牀列宿移曉看雲氣繞茅茨入山似爾真能勇
學問憐子願已遲新歷且將迎燕至後游須及聽鶯時

浣花溪畔饒餘地肯許求羊借一枝

寄懷席紫閣

二首

浙江潮滿桂輪秋棘院追陪上客游青眼長歌催按拍
月明狂嘯共登樓左驂誼比綈袍重七尺身從鼎鑊留
爲報更生今已老遙將雙淚寄炎州

使君丰采亞胡威高臥羊城訟牘稀料得故人官似水
那堪客子賦無衣魂銷旅燕來江上夢繞梅花度嶺飛
苦憶羅浮峰頂月烟波淼淼寸心違

寄湖州太守尚木宗兄

二首

西射堂邊幽夢通春來池草雨濛濛一麾共惜延年出

萬死誰憐阮籍窮放逐差宜麋鹿性行藏堪笑馬牛風

須知冠蓋吾宗盛嶺表相望有二馮

時其武兄分守南昌

詔下金雞肆赦初開函驚見嶺南書未堪華髮逢豺虎
競道炎方徙鱷魚病骨支離詩興減緋袍忌諱世情疎
由來同姓無新故急難他人恐不如

紀子湘司理初度二首

方舟曾爲賦印須坐笑江城孟博俱吏有冰心推藻鏡
人從犀影頌騶虞綵毫獨擅西湖長玉笈親披五岳圖
應喜舊游來葛嶺壺觴共醉步兵廚

芳樽開值落梅天南國新鶯欲報遷阜蓋風流京兆筆

黑頭勲業仲華年暫勞才子蓮花府高咏仙人桂樹篇
聞道中朝須補袞春衣佇拂御鑪邊

勝果寺

鳳凰山上古招提隔岸青山接會稽澗水幾層穿宋苑
夕陽一片在蘇隄樹經樵斧鶴鷗少潮落江門白馬嘶
行到中峰更回首畫樓粉堞望還迷

般若菴小憇遂至萬松嶺

步屨城南鶯亂飛偶來初地客如歸一燈寂寂磬方歇
丈室深深花自圍竹影入簾侵佛座江聲連雨到禪扉
遠公借我青藤杖滿目雲山空翠微

崇聖院壁間石刻諸經爲黃慎軒董思白及嚴印
持忍公諸先生書字法端嚴鉤摹精好坐臥其側
並搨數本以歸

支許風流迥不羣古牆花雨尚紛紛由來高士通三昧
可但中郎喜八分貝葉何年鏤玉版鮫人終夜護龍文
我來盥手尋遺墨絕勝羊生白練裙

戎裝美人燈

三首

未笑先防下蔡迷健兒裝束映青藜蠻靴窄窄裁冰翦
羽葆輝輝綴火齊似竊兵符來臥內應無魂夢到遼西
裂繪舉燧千年後又見宮娃拊鼓聲

螭首鴉黃插鷓鷯
鰲山峰外逞腰支
文姬千里從征日
紅線三更入魏時
嬾著霓裳奔月窟
易傾燭淚怯風姨
上元何處停鸞馭
只在明星玉女祠

香閣由來賦小戎
蘭皋仍復怨飛蓬
腰懸錦帶魚腸豔
步印金蓮鳳脰紅
皎皎何須雲母幃
珊珊長傍藥珠宮
東皇欲報暎將出
寶炬先驅女侍中

和王玉映前題

四首

娥娥紅粉羽林郎
橫槊宵征校獵場
吳苑火攻教夜戰
阿房星鏡改新裝
雙彎鐵月懸弓影
一點靈犀射甲光
自是偃師誇絕巧
眩人結隊出昭陽

瘦削腰支似沈郎若爲烽燧向沙場
夫人城外木蘭戍
太乙宮中韎韐裝衫映星紅
天不夜劍橫綈練雪生光
更闌可怕金吾問新佩銅符出上陽

錦繖曾聞照夜郎由來閩內制疆場
長城高挂秦時月
小隊爭看洗氏裝未到關山愁雨雪
爲防火伴歛容光
天街不羨魚龍戲士女傳呼滿洛陽

貝帶渾疑傅粉郎豈因射雉出平場
乍廻金粟堆邊影
又學燕支塞下裝神女行雲環珮動
元妻如媼鬢雲光
迷離誰辨雌雄兔不願揮戈駐魯陽

三月十五夜月同粲若鄴仙晦生分韻

三春風雨百花殘倦客登樓見月難素影初移疎竹動
清光半入大江寒關山北望迷烟樹余家室尚客都中烏鵲南
飛惜羽翰欲啟湧金門上鑰吹簫起就六橋看

送別張登子

二首

信宿高齋意惘然招魂驚說再生年欲銷積疾惟呼酒
自笑微軀敢問天草閣朝看秦望雪梅花春放鏡湖船
卜鄰傍汝南華館抱甕長歌秋水篇

鶯花三月峭帆孤聞道相如騎甚都北固重臨多戰壘
黃河西上見平蕪世情不易容龍性交道從來在狗屠
京洛若逢金馬客故人憔悴得知無

謂虎臣也

贈同年杜子漣之任四明

江干偃臥雨霏霏，忽報雙旌款竹扉。
失意驂驪元慘澹，得時鷗鷺自翻飛。
樓船滄海羊開府，烟月揚州杜紫薇。
此去蛟門惟共嘯，羽扇且須揮。

送荀淑公歸里二首

尊公余受業師也

童穉追隨竹馬年，康成門下客如烟。
過庭共羨星辰聚，負笈親承弟子篇。
鄉國陸沉桑變海，髮毛蕭颯雪盈顛。
耦耕亟爲求黃犢，七子峰前有石田。

客中況復唱騷歌，典盡鸕裘喚奈何。
亂後山川那可問，別來親串竟無多。
世情落落休彈鋏，歸夢迢迢在伐柯。

君到淮陰倍惆悵王孫祠畔滿青莎

同諸子送劉震脩歸錫山分韻

白公隄上雨蕭蕭醉客狂歌踏六橋別夢預懸瓜步月
愁心深似淝江潮玉樓何事呼長吉纖纈於今感孝標
君到廣陵應小住北歸已卜甲之朝

寄贈寧波太守崔年兄

二首

年來多難客飄零此日逢君眼倍青海內交游成舊雨
天涯兄弟感晨星春深雉尾隨車蓋日落潮聲滿訟庭
崔實姓名聞帝座已將三異紀銅屏

勾章十萬戶蕭條遺老騰歡五袴謠露冕春風看蜃市

充盤佳味羨江瑤賦成金石懷孫綽頌起田疇說鄭僑
何日雙熊來葛嶺南屏寺裏坐深宵

飲繆湘芷先輩齋中 二首

威鳳翩翩覽德輝先生早已賦初衣藤花署裏留金鏡
葛嶺祠邊有釣磯抱甕人同修竹老彈碁客被異書圍
不嫌展齒經過數索酒來敲白板扉

君家竹塢未一畝頗類歐公畫舫齋

齋名半舫

卷帙之中見

赤壁

先生出唐寅赤壁圖共觀

几杖而外惟青鞵詩過建安不必讀

人如叔度真可懷竟日淹畱增道氣况聞黃鳥鳴啣啣
湖舟同諸子送孫啣公之閩中是夜宿笑隱菴分

賦二首

湖光不厭扣舷頻，況送扁舟指劍津。
黃鳥偏催游子淚，青山能學美人顰。
繫絃急管春方盡，翠黛明霞晚更真。
誰道支公忘色相，驪歌一曲轉傷神。

綠髮白苧木蘭船，憶在山陰脩禊年。
襖被未聽菡萏雨，布颿去趁荔枝天。
清歌半爲周郎謾，密坐還因趙女偏。
君到武夷明月夜，登臨須寄遠游篇。

寄陳若水

十年畫省憶含香，百尺高樓共一牀。
惟爾能容中散傲，何人堪效次公狂。
使君清嘯梨山月，賤子悲歌燕市霜。

息壤未寒高誼在夢魂終夜繞漁梁

賀嚴庶華成武進士給假歸娶

羨君伯仲曲江游先後看花玉殿秋漢代公孫誇射策
班家小弟易封侯栢梁宴罷歌朱鷺錦里歸來控紫駟
燕喜更看盈百兩宮袍賜出映吳鉤

壽韋子寅封翁二首

懸車十載羨抽簪棠滿勾章蔽芾陰三徑開時餘綠野
一經遺處勝黃金臥游壁上天台賦笑傲花間梁甫吟
共道歲星來石室桂花新釀且須斟

君家冠蓋鬱相望諷諫曾傳韋孟章近代循良誇甬上

古來耆舊在襄陽
丈人高枕藏丹訣
太守新銜長醉鄉
我欲裹糧同採藥
杖藜飛渡赤城梁

湯鑊餘年再攬湖山之勝形骸土木頽然自放淵
明止酒深愧未能周顒戒肉竊有志焉豁堂大師
惻然哀之憫浮生之汨汨辱提誨之諄諄捧誦來
篇愔然流涕書之座右一坐臥不敢忘也依韻賦

荅兼以志愧

二首

蠟屐來登選佛場
數年岐路歎亡羊
谿山共爾成三笑
風俗隨人餽五漿
湖上梅花應入夢
洲邊杜若爲誰芳
導師摩頂深悲憫
貽我良規字字霜

若愛淵明罷羽觴自憐結習未能忘不逢開士施鍼砭
已分餘生老醉鄉惜別雙峰雲欲碧長愁萬里葉仍黃
從來支許交相勉把臂還期過講堂

同閔宮用王古直及小壻王五文南屏看紅葉作
多時不向南屏路霜落汀洲木葉翻雲氣出時移塔影
楓林斷處接城垣半規纖月弦初上夾岸幽禽棲復喧
歸計未成慚穉子柴車何日故山園

過豁堂和尚有贈

木落南屏秋正初繩牀相向對芙蓉堦前石是生公第
岸上舟爲長史居病起天花香自繞夜涼柿葉老能書

浮生冉冉真堪笑，臥聽鐘聲愧有餘。

湖上晤鄧元昭年兄

汝從隴阪賦，初衣萬里冥鴻弋者稀。澤雉未堪頻觸網，江鷗相狎漸忘機。埋憂五岳無深壤，招隱三山有釣磯。屈指交游堪涕淚，燭花頻翦曉星微。

贈趙次公

時自武義投劾待質於杭

西陵雪涕共銜盃，爾我遭逢重可哀。若爲香山須勝友，卻教彭澤賦歸來。懸藜徑尺終難點，意苴盈車本易猜。苦憶二勞明月好，金庭石屋待君開。

祝張振先壽

處士明星映斗杓，堦前玉樹更凌霄。
鳳池視草光三殿，鳩杖看花息六橋。
綠野梅開朝放鶴，蓬山雲繞夜聞簫。
上庠此日誇人瑞，佇有龍章錫聖朝。

湖上喜晤盧長華世兄

江城高臥雨蕭蕭，有客來過慰寂寥。
握手湖山供偃蹇，側身天地歎飄搖。
扁舟觸雨攜雙橘，碁局開軒見六橋。
聞道夷門堪避地，杖藜採藥欲相招。

潘母陳太夫人六袞壽

鍼神芳譽滿江臯，鍾郝家聲閱閭高。
雜佩珩璜躬自贈，服勤井臼晚猶操。
北堂夜月九熊膽，南國秋濤起鳳毛。

此日蘭陔稱盛事笙歌三奏薦冰桃

挽王雲翼

忽漫占星掩少微微君一去淚雙揮空餘三徑松無恙
共訝孤山鶴不歸王烈囊中畱石髓戴逵江上有柴扉
行行且掬西陵水腸斷人琴雨雪霏

畱別馮鍾石憲長

二首

江城蕭瑟共班荆舊尹於菟果再生中散自來多厚謗
大馮今日有高名歌成白苧花間囀酒熟烏程雨後傾
欲挂征帆回首雪鴻霜角不勝情

君恩重許看湖山笑比沙鷗去復還貧病轉慚交義重

登臨誰道客身閒
長留詩卷烟霞外
尚有綈袍天地間
此日西泠橋畔水
濤聲何似淚潺湲

寄懷河南督學張公遷

四首

使君旌節下成臯
馮軾中原簡譽髦
定有書生如賈誼
至今啟事憶山濤
兔園雪滿羣賢集
熊耳雲連少室高
羨爾紗帷談易處
虎皮獨坐勝東曹

憶放金雞謝赭衣
故人失喜淚頻揮
方憐燕市枯魚泣
忽作梁園斷鴈飛
愧我飄零成白首
看人容易到黃扉
佛狸祠下停雙槳
懶上焦山百尺磯

君家丁卯橋邊宅
苦憶連牀聽雨時
黃鶴山深春載酒

杜鵑花發晚題詩著書遠過許仲晦生兒酷似劉穆之
二公皆丹徒人莫向風塵嗟濩落鷓鴣池上羽毛奇

聞道吹臺近已蕪繁華終古孝王都千金結客思公子
中夜抽毫有大夫坐擁鄒枚誇上駟經從河洛起真圖
敝裘欲就扶風帳慚愧蘇門長嘯徒

過嘉禾贈姚際斯僉憲

中朝丰采羨陽城威鳳梧桐翩翩聲書奏楓宸焚諫草
風清銅柱識高名召公憇處棠無翦賈父來時鼓不鳴
我愧前賢三過此南樓烟雨喜初晴

小女至舟中喜而有作二首

故園燕子恨巢空憶汝昏昏眼欲膏病骨倩誰收李固
布帆且喜共梁鴻若爲男子薪應折學作人姑織益工
百畝磽田荒且半歸耕春雨正濛濛

淚痕三載一朝乾飄泊江城歲又闌舊繡天吳縫短褐
遠攜海錯代椒盤驚魂招後愁重語穉子當前病始寬
祭罷新詩判盡醉扁舟今夜草廬看

喜示外孫宗元

曾持虎節赴秦川報道桑弧爲汝懸半世多艱將豁齒
十年纔見欲齊肩解隨慈母牽衣泣卻戀衰翁共被眠
今夕團圓成泛宅語兒鄉裡度新年

寄秦補念觀察二首

誰從請室唁微躬，憶汝潛過北寺中。
握手已成千古別，解衣真有左驂風。
騶虞所至憐生草，鴻雁將歸恨轉蓬。
見說南州高義在，肯教客子歎無戎。

去年飛鷁到湖干，信宿江樓秋色闌。
顧我重逢疑是夢，知君三刺必須寬。
邇來世法交游絕，自古書生貨殖難。
日落九江烟樹隔，掬將雙淚報任安。

同嚴武伯袁周植王爾調諸子夜集分韻

江城雨過火雲飛，樓角明河影細微。
急管吹殘教進酒，流螢巧欲入人衣。
張顛醉後書偏好，阮籍窮時哭未歸。

他日一枝須並隱蒹葭玉樹正相依

金太傅齋中賞牡丹 三首

東山絲管樂無涯春色先臨太傅家
退食不言溫室樹歸田偏種洛陽花
烟籠曲榭施青障月映層城簇絳霞
欲掃朱門依幸舍醉歸恐污相君車

爲探梅花鄧尉來平津池館共徘徊
恰逢氣朗天清候驚見姚黃紫魏開
白紵臨風還自按玉盤承露更須栽
何人東閣吟紅藥授簡應慚謝眺才

題岸上人至孝通禪卷

色相由來幻也真緇流還復獎人倫
堪憐孝子銜哀日

始信支那不壞身四大偶捐歸泡影一家無著與天親
蓼莪我亦編曾絕俯仰乾坤愧鮮民

九日同姜如農王西樵程穆倩諸君登慧光閣飲
於竹圃分韻

塞鴻猶未到燕城載酒登臨雨乍晴山色淺深隨夕照
江流日夜變秋聲上方鐘磬疎林滿十里笙歌畫舫明
空負黃花羞短鬢寒衣三澣客心驚

祝金跛宋年兄壽

憶昔燕山躍馬年高飛鴻鵠喜聯翩經過郭隗荒臺下
醉倚荆卿酒肆邊三逕近開丞相第五湖爭羨孝廉船

謁來介壽黃花節笑插茱萸佐錦筵

丁未閏月姜及生封翁招同孫魯山先生游牛首

從獻花巖至祖堂信宿乃還

三首

城中雪霽瞻雙闕此日追陪杖底看古木十圍遮鳥道
大江千里見龍蟠行穿洞壑棲禽響臥近星河襍被寒
壺榼已傾童子報夜來添笋足朝餐

百尺危梯倚翠微薜蘿深處啟禪扉塔顛紫鶴馴仍下
樹杪黃鸝靜不飛絕壁樓臺朝日射下方城郭晚烟圍
丈人筋力過吾健歷險尋源願豈違

青鞵白袷澗花香天作文殊古道場六代殘碑江總記

數聲清磬法融堂月來曲磴松陰碧風起平疇麥浪黃
寓目虎頭金粟影畫圖真見白毫光

余年五十有三方舉一子於吳門會以他事畱金
陵踰年六月買舟東下行次宜興阻風三日漫賦

此章示柳生公韓

吳趨作客欲爲家弧矢初懸感鬢華漸喜長身求竹馬
卻憐黼面過桃花陶潛紙筆何須計劉表男兒且自誇
寄語石尤休作惡楓橋明月片帆斜

寄孫沂水祁丞

聞君五馬下番禺忽報寒帷長鏡湖十里松杉神禹廟

萬家樓閣越王都，堪驚投杼身將老。且喜彈冠病欲蘇，
爲訪故人過剡曲。紛袍應亦念窮途。

湖上晤王子側孝廉有贈

鄉曲翩翩馬少游，月明燕市共登樓。別來淚向鵝原滿，
到日江涵鴈影秋。去國襁生懷半刺，浮家陶峴失三舟。
西泠松栢今無恙，載酒何當問莫愁。

湖妓殷二娘西樵最曠之

贈王鳳池少叅

使君晚節白門棲，棋局詩囊手自攜。攬轡清風留蜀國，
扁舟明月到蘇隄。醉歸洛社人逾健，笑指方壺路不迷。
聞道天台秋色好，烟霞深處策青藜。

竹夫人

水殿中宵選下陳
桃笙角枕許相親
專房不妒那兼尹
傾國先封號與秦
錦繖漫誇娘子隊
冰盤長伴女兒身
秋來棄置同紈扇
無那班姬翠黛顰

九日登葛仙嶺

杖策幽穿薜荔叢
仙人鐘鼓考新宮

葛翁祠
字新成

卻看黃菊

開巖際不見丹砂出
井中千里江流寒漠漠
六橋秋色晚濛濛
浮踪轉向尊前笑
來往無端似塞鴻

王社叔壽詩

角里先生近若何
綸竿端不羨鳴珂
漫勞冰玉誇清潤

自有烟霞供嘯歌，星旁少微雲氣繞春深。大滌藥苗多蒲輪，聞道徵耆舊會見雙旌到薜蘿。

上虞高母江太孺人壽詩

湖畔逢君歎式微，故園空負老萊衣。母兮鞠我心何苦，吏也長貧客未歸。每羨畱賓空鬢髮，肯容封鮓到庭闈。共看膝下鸚鵡滿，交映階前鶴髮稀。

茅友苞母蘇老夫人壽詩

金貂奕葉映朱門，鍾郝徽音淑範存。挽鹿山中偕大隱，丸熊夜半啟諸昆。聯翩競羨三珠樹，臚唱還占五色雲。介壽未須筇竹杖，北堂萱草日方暎。

贈姚又度

穆穆華髮杖朝初
裙屐翛然鶴不如
几上盤盂三代器
枕中丹訣八公書
青精飯飽開新釀
白岳雲深憶故廬
徵聘已聞脩曠典
戴逵何以謝安車

吳菌次招同白仲調鄧孝威王惟夏孫坦夫介夫
泛舟夾山漾分韻

杪秋風物莽蕭疎
太守行廚載酒初
烏柏新紅迎屐齒
青山積翠溼巾車
上方佛閣烟纔暝
隔岸人家畫不如
更欲尋源迷去所
且停五馬問樵漁

沈公抑壽詩

曾醉君家八咏樓美人中夜擘筵篋梁間曙色塵猶繞
座上橫波翠欲流結客先投青玉案看山不厭白蘋洲
楓林處處堪乘興蠟屐相從汗漫游

贈吳蘭次太守

東閣官梅半欲開滿堂詞客共銜杯登臺檻外青山出
露冕車前白鹿來春酒聊因田父醉新租不遣吏人催
湘簾畫舫應多暇擬向蘋湖泛雪迴

峴山和吳見末

碧湖如練抱城流杖策登臨一鏡收殘雪樓臺聞梵唄
夕陽鐘磬在漁舟寒鷗點點輕相傍古木蒼蒼晚更幽

倒載接羅須盡醉時人莫擬漢江游

孫太初墓

太白山人去不歸空餘荒冢傍漁磯百年樵牧迷華表
一代文章有布衣雪滿五湖龍自蟄月明西塞鷺還飛
誰言身後無知己素榜新懸俎豆輝

同周釜山吳六益吳仲徵胡去驕訪筠士上人登

一覽樓分韻

爲看修竹過精廬有客登樓覽太虛楊柳正眠芳草合
梅花半落燕來初空堂鐘磬諸天迥別浦帆檣返照餘
聞道支公開講席重來且聽演三車

周釜山邀同諸子宴集機山草堂

君家草堂何窈窕，夾山臨水開柴扉。
窗中虛白看雲出，樹杪殘紅見鶴歸。
丙夜客來還剝啄，辛夷花發自芳菲。
三春風雨今晨好，巫辦青鞵踏翠微。

宿諸乾一七峰雪堂分韻

萬壑飛流帶草堂，梅花零落尚餘香。
人閒自洗青山骨，客到常支白鶴糧。
夜半星光搖石壁，曉來雲氣亂匡牀。
知君綵筆縱橫甚，欲繪藍田輞口莊。

夏考功先生廿年淺土門人盛珍疇卜地葬之以
其夫人祔焉余高其義爲詩以贈

幾年松檟缺經營負土荒原賴友生曾賦國殤悲翟義
竟無傭保付王成月明大鳥來華表劍合雙龍捲素旌
二陸冤魂應共語雲旗風馬笑相迎

太保梁大將軍初度四首

興朝佐命卜非熊半壁金湯一戰中共羨長城能卻敵
獨依大樹不言功人如儒素羊開府身係安危郭令公
南顧未須勞 聖主樓船已奏海氛空

鄉國會勞馬伏波功名似讓後來多不因滬瀆諸軍力
誰返虞淵三舍戈雅度人傳揮白羽策勳天府誓黃河
投壺散帙應多暇鈴閣長容二仲過

環甲當年指石城至今草木尚疑兵
盧循莫倚黃龍艦
陶侃先臨朱雀桁
客到旌門元許揖
師行天上竟無聲
三吳士女今安堵
願借饒歌祝日升

地控三江幕府開
折衝萬里借雄才
千年戰伐圖麟閣
九日詩篇戲馬臺
白雉已從方外貢
黃花偏愛雨中栽
西郊楊柳青如染
勝賞須教野客陪

宿陸侯菴秀林草堂

甫里先生善閉關
釣車漁艇未嘗閒
水亭深處多黃鳥
瘴海歸來載白鷗
百疊雲光藜杖外
九峰山色竹樓間
欄邊鬪鴨能言語
肯許求羊共往還

張漢度靈阜山堂

是王屋先生讀書處

翠屏罨畫水軒開三徑人稀滿綠苔
錦石自縈書帶草脩篁長護授經臺
饗人作膾探魚笱稚子抔弓問雉媒
莫歎匆匆歡未展寄言脩禊欲重來

東侂草堂爲董得仲作

二首

第九峰頭雲樹多幽人卜築傍巖阿
亂流幾曲隨鷗鳥古木千章帶女蘿
花事闌珊無那曉酒籌歷落不妨苛
阿戎雅欲畱髡醉坐愛春山點翠螺

廣川絕學有春秋抱膝端居不下樓
別館郤鄰何水部新銜自署董糟丘
高陽客至開三徑廬岳僧來共一舟

十畝之間多勝賞黃鸝芳草正堪游

過顧見山園林

我來三泖湖邊住苦憶江東顧野王暫到竹林無鶴報
獨憐苔徑被雲荒坐看澗水穿疎檻不放鶯聲出畫廊
知爾京華逢上巳高梁橋外正傳觴

同周宿來吳六益胡去驕吳仲徵及家楚鴻舜納
九一小集南園

風雨催成黯澹春偶攜雙屐到平津依然竹里彈琴館
無復蘭亭脩禊人桂樹堂空巢白燕桃花水暖戲朱鱗
舊游剩有周顛在清淚同沾漉酒巾

送周鷹垂赴試北闈

載酒看山結伴行
驪歌忽唱不勝情
歸鴻曉度春申浦
匹馬寒嘶樂毅城
駿骨金臺空北冀
蟲書石鼓見西京
周郎年少知音早
早能使羣公倒屣迎

送楚鴻就試成均

吾家北榜誇三捷
躍馬燕臺愧老夫
後起者誰張赤幟
先聲仗爾挽雕弧
陸機自是雲間鶴
李廣寧爲轅下駒
此去蓬山應不遠
七香車子聽傳呼

寄桐鄉令俞翁仙

鳥鼠山前別幾秋
驚心冉冉歲華流
美人退食馴朱鶴

客子餘生抱白鷗，問俗賈綜常露冕。辭家王粲強登樓，知君不倦綈袍贈。坐遣春風破旅愁。

送徐安士北上

烏衣珠樹羨文孫，少小聲華遍國門。鄉里陸機推後勁，文章徐幹有中論。卽看鵬鶚橫秋日，莫爲鱸魚憶故園。待我荆高酒樓上，桂花開日醉金樽。

羅以獻胡去驕，將歸武陵漢陽小集南園卽席分

韻二首

纔從雙屐探梅萼，忽送孤帆折柳條。唳鶴灘頭春欲盡，鷓鴣坡上夢方遙。生徒南郡悲長笛，詞客西京有洞簫。

我亦因君動歸思那能長住伯通橋

天涯衰疾二毛侵自得君來喜盍簪陳榻雖懸多倦色

郭碑初就倍沾襟

時爲先夫子志墓文成

小山桂樹須相憶古洞

桃花尚可尋黃鳥飛飛應惜別數聲睨睨落疎林

贈裕源進士

阮家風雅羨南宗文藻翩翩有仲容
共道天閑收上駟暫從海嶠臥元龍
牙籤歷亂開千帙竹杖蕭閒到九峰
多病喜君相慰藉清樽終日對芙蓉

寄顧見山水部二首

賜環新拜主恩偏共道珠從合浦還
考牧曾題沙苑馬

乘槎方佐水衡錢章江東下光如練估客西來花滿船
清簾疎簾應拄笏綵毫終日貌山川

去歲聞君畫錦迴無緣 共銜杯故人霄漢須相憶

客子江湖祇自哀茅屋暫棲三泖畔梅花長在鬱孤臺
懸知官閣題詩徧珍重虔州驛使來

追送艾石家兄赴蜀遇大風雨越日重九始霽登

燕子磯作

渺渺孤帆指石城峭寒風雨助江聲正愁欹枕佳辰過
纔上危磯曉日生斷鎖沈戈迷舊跡浴鳧飛鷺喜新晴
茱萸高會猶能及蜀道青天萬里行

送艾石五兄之任蜀臬

四首

迢遙憲節赴成都清問臬陶帝曰俞共道一星銷貫索
卽看萬井頌騶虞錦江風物花深淺春草池塘夢有無
小弟周南獨畱滯好將雙鯉寄東吳

蒹葭江上露淒淒況復蠶崖雪嶺西執法并州瞻舊節
勒銘劍閣待新題韋臯佇補中朝袞溫嶠方然五夜犀
到日相思知倍切裁眉山月杜鵑啼

君從晉
臬調蜀

彩鷁光輝照石頭驪歌將唱復遲畱山川蜀道黃牛險
烟雨秦淮白鴈秋寒月舟航須早達衰年藥物許相求
此方蒟醬兼筇竹莫惜飛鳧托遠郵

數年小草已無心散髮行歌感陸沉麋鹿山中甘自放
鶴鶴原上誼何深干霄敢望稱雙劍焦尾還堪製一琴
無那惠連偏滄淚謝庭元自有知音

贈簡謙居學憲

二首

使君旌節下岷峨三戟門庭接玉珂猶子仲容偏早達
得人叔則最爲多金莖清切文昌座絳帳光分太史河
萬里龍媒秋正好貢將天馬入郊歌

鷓班先後忝東曹羨爾聲華徹九臯蜀國才人工作賦
廣陵秋色壯觀濤齊梁金粉應須變揚馬風流尚可操
聖主右文歌早麓賢臣嘉頌屬王褒

同蒲菴和尚訪 子超山居不遇

遠公相送出招提，同款柴扉落照低。
秋色已殘存橘柚，江潮初退散鳧鷖。
疎籬對菊香侵屐，小閣看山翠滿梯。
況有阿戎供茗椀，不勞鳳字竹間題。

庚戌元旦 二首

三泖浮家願已違，百花西里送春暉。
癡兒漸解呼梨棗，故國空慚老蕨薇。
江燕若來如舊識，塞鴻莫遣又先歸。
爭知京洛彈冠好，怕見緇塵染素衣。

龍角蒼蒼斗柄橫，春風吹滿闔閭城。
醉來諸蔗還堪杖，客到蕪菁尚可羹。
種秫田逢雀鼠耗，采蓴社與鷺鷗盟。

梅花夙約今須踐
驢背何辭冒雪行

元日祀先大夫兒輩相隨拜跪頗能成禮喜而有
作二首

華髮支離歎鮮民
椒觴獨薦每沾襟
松楸又歷三冬雪
俎豆新添一輩人
拜舞宛依嚴父膝
登臨能掖老夫身
明年小塾誰先入
篋裡遺經爲爾陳

蕭瑟生平庾子山
生兒猶未識鄉關
外家近在吳趨里
齊語徐歸莊岳間
舊繡袞衣增旅困
新橙勸酒破衰顏
老妻書札盈三尺
竹馬秋來定北還

元日日食陰雨不見越
四日微雪不成夜
乃大雨

排悶賦詩

歲云改矣寒方劇日有食之雲氣微柳色偏於南國早
雪花長似北人稀愧無旨酒會鄰里且擁殘書眠竹扉
堪笑兒曹強解事闌街簫鼓試春衣

初春寓吳簡姜如農給諫二首

久向江天理釣綸杖藜相見轉相親如君豈屑吳門卒
許我來爲洛社人鄉曲舊曾陪宴尾烟波今已屬閒身
飽聞鄧尉梅花發蠟屐追隨莫厭頻

翦韭重將竹馬論驚心碩果兩翁存殊方春色催衰鬢
是處人情勝故園澤國同尋麋鹿伴池塘堪痛鶴鶩原

安邦集才苑卷四
他年兒輩稱膠漆吳下朱陳又一村

和如農雪中見過

二首

茅堂擁褐峭寒餘華髮論文愧不如無那故人江外少
肯教蠟屐雨中疎早梅許我攜鳩杖晚飯呼兒煮鯉魚
春草欲生悲小謝不堪重讀茂陵書

君以令弟如須
遺稿屬余爲序

漫說窮愁詩益工髯蘇風俗許誰同閒看鷗鳥翻碁局
笑拂珊瑚理釣筒秉燭窺書林屋洞浣花釀酒杜陵翁
輸君婚嫁都無累何日青鞵到剡中

蘇州郡學爲范文正公故宅經過贈禮有感而作
先賢宅是素王宮樹羽歌鐘祀事同泮壁自流君子澤

松杉猶有大臣風

用杜牧晚晴賦中語

科名在昔稱吳會冠蓋於

今勝魯中何事王珣偏佞佛虎邱池館一朝空

姜奉世新寓園亭故相國申文定公別墅也余所

居西百花巷相去纔二百武客中無事晨夕造訪

賦詩書壁以紀歲時

四首

茂苑樓臺舊午橋碧梧修竹倚雲霄幽人卜築今方穩
客子移家幸不遙酒興恰隨花信發鄉心難共雪痕消
杖藜從此過陪數莫遣平頭折簡招

冠蓋當年盛故鄉論交三世羨潘揚夕郎封事畱青瑣
吏部遺文滿墨莊松菊荒蕪堪灑淚江湖飄蕩此登堂

故人賸有姜肱在百尺高樓共一牀

結搆何須論拙工知君邱壑在胸中
林塘疎豁用卿法巾几蕭閒有父風
萱草階前抽短碧梅花雪裡弄新紅
醉歸不畏春泥滑只在吳趨巷口東

泛宅相期傍五湖天涯吾道未云孤
觀濤詞賦思枚叔蠟屐風流羨阮孚
湘箔不垂通乳燕松梢勿翦待巢烏
西窗石榻因誰設拄笏朝昏許老夫

剖石禪師示寂鄧尉之聖恩寺詩以弔之

二首

尚想支公白氎巾東林曾此翦荆榛
湖邊說法龍嘗聽樹下經行鹿已馴
吳會衣冠思古德沃州瓶鉢有門人

自憐華髮蹉跎甚問道無緣愧許詢

一滴曹溪百派分微言端不落聲聞天花散後何曾著
栢子新來遂不焚錫杖遙分千嶺月松龕深貯五湖雲
白毫光裡西歸去空使人間怨夕曛

何匡山竹罌草堂次吳梅邨先生韻

高隱何須向樂浪初衣賦後鬢還蒼百年地是柴桑里

君先世爲
膠城人

第五橋通藍水莊黃鳥好教花作屋白鷗相

伴酒爲鄉琅玕節比鷓鴣杓好客頻來問索郎

君家酒
皆北釀

陳叔明膠城之隱君子也與何匡山居隔一巷園

花盛開信步造訪率爾有贈

白版雙扉野水濱小堂疎檻曲藏春名花端合陪高士
修竹偏宜臥酒人共羨龐公稱大隱況聞何點在西鄰
黃魚入市香醪熟剝啄休嫌展齒頻

何匡山招同俞嵩菴進士看雨中牡丹俞詩先成
予分得圓字

梅花東閣已蕭然簇簇朱欄擁絳仙巫峽晚粧香作雨
洛川朝步玉爲烟鶯能伴客須頻囀月若多情幸早圓
欲賦傾城誰得似綵毫偏讓李青蓮

祝胡元孚夫婦七袞

羨君高臥鏡湖邊鶴髮鬢鬢陸地仙大藥已從天姥得

少微長映客星懸百年自喜同梁案半夜初回訪戴船
況有謝庭珠樹好宮袍佇看錦衣鮮

三月十五夜招同王翰臣余澹心王爾調宴集侯
秬園明月堂分賦二首

楊花如雪送春歸歎息春來見月稀

自正月至閏二月皆陰雨

四座

壺觴邀醉客滿林梧竹散清輝烟深烏鵲棲難定鐘曉
魚龍勢欲飛誰弄哀絃伴長笛關山一曲淚沾衣

西園公子共憑闌高會難逢此日歡鶴影恰宜紅藥映
波光偏覺綠蘿寒漫勞歸騎催銀燭且喜含桃滿玉盤
痛飲莫辭還卜夜桂輪微缺更須看

慰董榕菴喪子

故人何事二毛侵，歎息階前玉樹林。
我愛枚臯曾拊掌，君如庾信獨傷心。
鵝雛未長魂歸海，鶴子猶疑影在陰。
天上石麟重抱送，金環畱得不須尋。

端午前一日周鷹垂王顯士季友看龍潭競渡大
雨如注改席春暉堂分韻

佳辰將及歎愁霖，裙屐登堂少長臨。
梅子已同朱李薦，榴花偏上綠鬟簪。
三閭遺恨蛟龍怒，二陸荒祠松柏深。
霽日聽鶯還載酒，竹林嵇阮正堪尋。

贈顧東廬

顧陸東吳舊世家黃門博物至今誇人如楊柳春三月
宅傍蒹葭水一涯釣艇曉衝黃浦雨綵臺高寫赤城霞
相逢恨晚言歸速無那離羣感鬢華

贈張詰森

仲蔚高風獨閉門引看紅藥破苔痕階前磊落南宮石
座上飛揚北海樽黃鳥數聲催柳絮朱絃一曲坐桐根
不嫌屐齒頻來往玉潤冰清共爾論

將發葺城淫雨弗止趨雙白出郭相送因而小畱
同右文游細林道院

峭帆方挂雨淒淒蠟屐招尋到泖西古木看來惟見杪

小舟牽去已無蹤，白波萬頃迷秧馬。青草千春哭鷓鴣，
別後應知愁米價。移家何處武陵溪。

題戴蒼畫陳階六小像和王阮亭韻

枯魚客舍憶同焚，別後相思雨雪紛。夢散梁間餘落月，
詩成江上有停雲。紅牙按節傳新曲，青瑣陳書紀舊聞。
醉酒美人堪送老，惟君能學信陵君。

李鏡月歸自粵東以羅浮畫卷索題兼貽端硯念
珠賦謝二首

纔自匡廬覽翠微，烟霞猶在薜蘿衣。一雙草屨杳何處，
萬里蒲帆今始歸。曾拂珊瑚臨瘴海，親隨猿鳥到巖扉。

當年禽向深相許五岳蹉跎願已違

廿四橋邊喜見君挑燈終夜話奇聞快游恨未穿青靄
歸橐真堪贈白雲短髮相期尋物外長鏡從此謝人羣
多君遠道親攜得拂拭驚看五色文

京口弔談長益二首

憶在僧房醉濁醪瘦藤不倚尚能豪關情五斗羞陶令
慟哭西臺有謝翱射虎石邊朝立馬金鰲背上夜揮毫
我來欲作招魂賦剗地西風捲怒濤

微服曾從北寺還吞聲躑躅淚潛潛憐余幾續膺滂後
惟爾無慚生死間脚踏盧龍臨瀚海魂爲白鶴瘞焦山

故人近報方干死地下相逢且破顏

余友方爾
止計至

夢沈繹堂太史

秋鴈南飛秋未央病中驚見沈東陽
玉山四照風生坐角枕三更月滿梁
客子江湖偏易老故人京洛例相忘
寒溫甫畢雞聲曉未校腰圍帶短長

哭同年徐默菴

西陵仙吏久辭官詎有丹砂可駐顏
莫怪人情似鳥雀可知天意賤芝蘭
晨星無幾寧堪落流水從今不復彈
何用石麟眠塚土寶公會向掌中看

廣陵喜晤蘇商卿年兄過輒畱飲頗行復辱贈詩

賦此畱別兼訂都門之約二首

躍馬偕登郭隗臺十年霜鬢各摧頽故交剩有百人在
余同年在者 昨夜相逢一鴈來擬築茅堂分笠澤欲攜
纔百餘人

筇杖問蓬萊樽前且醉秦郵酒話及人情恐覆杯
竹塢繩牀說舊游未銷樺燭淚先流憐子薄命逢箕宿

愛爾新詩似柳州明月懷人成遠夢西風迎客入孤舟

莫辭匹馬衝微雪醉臥荆高舊酒樓
君嘗爲柳州太守

贈吳孟甫水部二首

相思十載絕雙魚此地聞君奉簡書楚國洪濤吞日月
漢家經費半河渠宣房塞罷黿鼉徙瓠子歌成壁馬虛

愧我飄零成白首故人執手歎何如

曾醉燕山酒肆旁月朗蕭寺夜連牀松間風雨堪浮白
篋裏龍蛇搨硬黃管樂自期誠不負應劉旣謝倍堪傷
射陽湖上班荆夕回首當年意渺茫

贈吳伯成

梁溪奏績勝河陽露冕風清白鷺鄉北闕徵黃書已下
南天借寇歲偏長山泉可比臣心潔美酒能分令尹香
此夕論文重下榻綵袍高義未能忘

贈鄒惕菴給諫

仙吏承恩拜夕郎姓名高列御屏張共看長孺居中禁

卻羨相如返故鄉折檻漫勞焚諫草負薪誰爲塞宣房
東南萬井方昏墊桑梓應知借箸長

舟中病齒做陸放翁體

三首

繫纜淮南葉欲黃不眠終夜聽寒螿長愁近得安心法
漸老難求療齒方搖落渾如剛敗奕欹斜真似欲崩牆
天津紫蠟秋來美鼻觀先愁滿七霜

饕餮生平已較多天公云罰敢辭苛未愁道路妨眠食
只恐登臨礙嘯歌驕語山妻猶有舌非關鄰女誤投梭
從來楚越元肝膽完缺從伊奈若何

少年編貝羨東方馬齒誰知有短長逝矣難留如脫兔

忽然相失似亡羊命非蔡澤生何益健比張蒼老不妨
黃獨青精真耐久芋魁新軟更須嘗

臂痛

虎尾餘生脫禍機衰遲真與病相依畏途久歎肱三折
旅臥新消帶一圍眠柳應慚黃犢健掠波空羨白鷗飛
書生自乏封侯骨相者從來不厭肥

舟中夜讀

病起蕭然岸幅巾蒲帆高挂四無鄰生憎白髮將子侮
稍喜青燈於客親興廢渾如前日事鬚眉真見古初人
他年笑向兒曹說垂老方知有斲輪

舟中雜咏

久辭簪組臥烟蓑看盡吳山越水多
萬里飽經黃蘗路用古樂府語七年重渡白洋河
腥風乍捲蛟鼉出新月高懸
蟋蟀歌慷慨尚存舟楫志不堪雙鬢自蹉跎

徐州懷古二首

寒烟漠漠水增波戲馬臺前振柁過
父老能言西楚事牧兒誰解大風歌
呂梁濤落支祁走芒碭雲深鴈鷺多
安得長菱塞洪子不勞壯士挽銀河

彭城舊是繁雄郡城郭頻經戰伐年
鶴放孤山招隱士燕空高閣鎖嬋娟
平沙渺渺橫新鴈衰柳疎疎咽晚蟬

欲共何人吹玉笛大蘇兄弟挾飛仙

贈紀子湘郡丞二首

時河決下流淮南
漂沒惟徐得免

佐郡彭城領上游使君丰采大蘇流山川楚漢千年跡
筐篚荆揚萬里舟廟略漫勞沉白馬宣房無恙醉黃樓
綵袍珍重頻回首颯颯西風客子愁

清淮怒挾濁河奔雪浪銀濤樹杪翻三策頻年咨賈誼
長隄千里倚王尊霜清大澤寬魚稅雨過西疇長稻孫
便欲停橈乘款段快哉亭上一開樽

生日舟中作

鷗波萬頃五湖寬老去重彈貢禹冠良友不教爲遠志

小兒漸解憶長安齊烟青處滄洲渺吳橘黃時白露寒

兩地夢魂何處覓扁舟今夜宿吾山

漢武瓠子歌吾出平兮鉅野溢今在

東阿界內

初至京王敬哉先生貽詩慰問依韻賦答

散髮江干帶女蘿薊門何意復經過五湖笠子風濤穩
長樂鐘聲感慨多放逐久無人問訊文章能遣命蹉跎
出山小草良朋勸猶自羈魂怯網羅

奉和孫北海先生元韻

散髮行吟獨斂眉重來東閣慰離思可憐人向江湖老
敢道詩從放逐奇退谷尚能陪蠟屐長楸不憤著金羈

平生故吏彭宣在醉吐車裊憶往時

送胡怡齋歸雲南

二首

薊門楊柳色初黃聞道雙旌下夜郎久向滇南瞻袞繡
喜從河朔共杯觴牙籤斑管喧終夕駿馬貂裘出尚方
別後詩筒須遠寄昆明池上有殊光

縞紵纔貽歎解攜離心芳草共萋萋人如蕭史歌青鳳
賦過王褒祝碧雞明月三更應入夢春山萬里總堪題
何人中路同脩禊空羨桃花逐馬蹄

送曹顧菴歸樵李

二首

塞鴻又向薊門飛送客登樓悵夕暉虎豹九關書不達

尊鱸千里夢先歸
征帆南浦驚紅葉
落日西山斂翠微
君到當湖鷗鷺喜
銀魚何似薜蘿衣

錢塘放棹月明時
不謂燕山共酒卮
弟子青雲多早貴
伶官白首乞新詞
論文賴有孔巢父
擊筇今無高漸離
方物最饒黃雀美
尺書珍重幸相貽

送劉石芝督學浙中二首

帝曰咨垂作朕工
皐比又指大江東
防河不用三犀刻
持節行看萬馬空
門外輜車爭立雪
帳前絲竹笑扶風
談經坐對西冷月
藜火光搖畫舫紅

車馬駢駢出鳳城
錢塘江水爲君清
汝南人物推冰鏡

天上星辰轉玉衡，
被檄詩還周大雅。
龍媒歌入漢西京，
奇才不乏朱翁子。
會見賢良射策成。

張幹臣學士建言左遷歸里賦贈二首

片言欲挽魯陽戈，
肯戀銀魚白玉珂。
三殿袞衣何事補，
西江遷客累朝多。
人依鹿洞歸壇坫，
操擬龜山歎斧柯。
聖主優容從薄譴，
書生忠愛本無他。
牽裾誰敢謁觚稜，
共道中朝有魏徵。
封事曾聞回御輦，
文章真不愧廬陵。
憂時淚盡瞻雙闕，
去國裝輕杖一藤。
天聽轉圓應有日，
佇看宣室召頻仍。

題王古直尊人雲棹先生鏡閣

徵君湖上好樓居坐對澄波萬頃餘
雨後微茫分約略
晚來高下見樵漁小窗佳客彈碁處
短棹孤山放鶴初
欲訪戴逵悲宿草青箱猶有未焚書

送王古直之通州崔老山幕

憲使遙分虎節新
驚傳記室得王珣
應無檄草勞才子
且喜琴樽共主人
地控盧龍連北極
歌成黃竹紀東巡
哀鴻遍野憂三轉
翠輦經過賴爾陳

武林晤侯赤社

時寇決大梁
尊公視師

驚沙漫野捲蓬飛
聞道夷門未解圍
梁苑才人思朔土
秦川公子未西歸
牙籤玉軸悲家乘
虎帳龍旌壯國威

十載夢君顏色好，不堪憔悴賦無衣。

贈王均五孝廉二首

江上相逢王子安，遠遊初試切雲冠。少年結客悲歌易，
歲晏懷人雨雪殘。躍馬今猶垂短袖，思家且莫倚危闌。
知君近有登樓賦，爲共吳鉤月下看。

幽懷落落向高旻，感慨尊前意氣真。亂後誰歌招隱士，
狂來爾號謫仙人。陸生車馬初遊洛，賈傅文章首過秦。
欲買扁舟秣陵去，試尋桃葉渡邊春。

劉遠公扁舟圖

五湖今日半風塵，畫裏重看折角巾。楚國大夫蘭作楫，

王家公子璧爲人山中薜荔供衣服海外珊瑚拂釣緡
試向匡廬尋舊隱孤雲秋月是前身

送龔芝麓起復還京

長安邸第舊朱樓簾捲珊瑚玉作鉤結客樽前銷蠟炬
退朝花下散名駒南歸歲月懷三秀北望關山咏四愁
舊日酒徒零落盡桑乾嗚咽水交流

姜黃門卿墅言事詔獄未幾乃付司敗賦此

二首

怪事驚傳溼葛巾堪憐北寺再生身聞君對簿呼高帝
自古明王恕小臣人號玉山偏煅煉骨從火宅倍嶙峋
橐籥汝季良辛苦書就鄒陽莫浪陳

漢廷鉤黨易雞連早見平臺放數賢汲黯愚忠歸主鑿
子瞻生死任人傳二親寧免當閤泣十載曾無負郭田
驢肯出都春正好可能長嘯海雲邊

贈吳錦雯

操琴相向意何如短笠青衫見爾初懷古自深廣武歎
憂時不上鐵鹽書越王臺畔懷西子趙勝城南弔左車
班草飛來明月後半生幽抱爲君攄

送董樵谷孫書石歸東山草堂

二子乘驢踏雪迴數聲鴻雁不勝哀知君自愛山中桂
顧我誰題巖下梅南郭子綦高隱地東方曼倩滑稽才

蒼茫天地能容汝何得常銜濁酒杯

飲牟澹修邸中

江臯日夜賦歸與歎息飄搖著卜居千里風烟悲異土
一時賓客似吾廬魯人風俗宗文舉漢廟災祥問仲舒
好借棋枰呼短酌篝燈爲話我生初

上葉慶繩先生

秋來燕子逐風斜簾幙依稀認謝家古道自然敦北海
舊遊誰復念西華板輿長對烏桺樹羽扇行揮白鷺車
江表遺民零落盡豈宜高臥戀烟霞

重晤李舒章二首

八安雅堂詩集卷四
五
漠漠陰風吹草萊故人悲喜更銜杯
競傳河朔陳琳檄誰念江南庾信哀
避地何如金馬署傷心莫問栢梁臺
蛾眉自昔逢謠詠嗟爾登高作賦才

曾向燕山對落暉重來陵谷已全非
卽看明主無金盃何事孤臣泣紵衣
春靄鳳凰朝起草夜深烏鵲繞林飛
艱難賸有吳鉤在回首江湖事事違

送李舒章南還

四首

高樓短筑憶當年細雨愁聽日暮鶻
白紵漫酬青玉案紫騮嘶絕綠楊天
何人更擬江南賦有客思歸下瀨船
珍重河橋今夕酒不堪雙燕畫梁前

垂釣堪思申浦魚驚心重歎亂離初鶯花又滿咸陽路
龜策難知楚客居碣石春寒猶有雁茂陵雲黯久無書

故人況逐扁舟去滿目江湖涕淚餘

時話甲申之變

蒼茫何處問機山送客登臺望楚關烟水欲成千里夢
干戈未遣五湖閒檣懸明月烏啼切草溼空城燕子還
脫帽相看聊佇立爲因風雨慰離顏

芳草迷離落照明當筵花影逐愁生風塵慘澹憐孫楚
婚嫁流連誤向平山色西來烟欲暝江流東去月無聲
飄零俱是吹簫客感慨還爲猛虎行

贈龔芝麓太常

仙客朝回散玉珂，
薊門春色未蹉跎。
人從鄴下風流健，
詩入關中涕淚多。
漢時猶傳朱雁曲，
祠官新紀白狼歌。
子雲寂寞耽詞賦，
肯許狂生載酒過。

窗外梨花 五首

縞袂仙人隔碧紗，
亭亭孤影亂明霞。
乍驚殘雪餘梁苑，
似浣清波向若耶。
雲母屏深珠露冷，
水晶簾迥月痕斜。
畫闌小立依稀認，
何處飛來萼綠華。

誰家繡箔綴明珠，
珊瑚初迴練影長。
豔曲還聞歌玉樹，
故宮久已罷霓裳。
綠楊嬌倚芙蓉苑，
紫燕銜歸玳瑁梁。
此夜秦川機上女，
莫將明月怨流黃。

孤娟未欲逐風輕，素質偏宜傍水明。
杜曲晴絲迷曉蝶，上林飛絮動初鶯。
三千粉黛珠爲戶，十二樓臺玉作京。
一自甘泉零落後，幾時還向御階生。

天涯草色碧如何，長日修廊映薜蘿。
香篆難忘湘客佩，紅牙偏稱雪兒歌。
風來翠幙吹銀蒜，月下清尊響玉珂。
誰向兔園曾作賦，綵毫疎影共婆娑。

曲榭幽闌事事宜，滿簾春雨醉茶蘼。
恰從亭畔迴繞扇，怯向燈前舞柸枝。
金縷夜寒香灑澱，玉簫吹斷影參差。
嬌魂寂寞應無語，對爾還吟白紵辭。

送吳素求之任同州 二首

阜蓋朱轡擁翠輶使君將母入秦川新愁未解文園病
舊事還從關尹傳輦下吹簫千里夢雨中驅馬二陵天
傷心欲掩金觴泣不獨銷魂倍黯然

時吳愛弟新亡

三年俱做驢驢裘短筑悲歌百尺樓書著虞卿垂欲老
人如吳質自多愁啼鶯故繞秦川路錦瑟難忘灞上遊
臥閣西華風雨夜憑誰更爲唱伊州

送傅介侯督餉寧夏

二首

賀蘭西望鬱嵯峨使者乘春攬轡過三輔征輸何日盡
二陵風雨至今多邊城楊柳樓中笛羌女葡萄塞下歌
看到坐傳青海箭不妨草檄倚瑠戈

東風拂檻草初曛隴水迢遙客路分
萬里白榆愁落日
三春黃鳥惜離羣笳聲半入關
山月馬首晴看華嶽雲
此去樓前知姓字君家介子有奇勳

招直方弟慈仁寺看海棠

並馬來看錦樹林殿門春盡晝陰陰
雨餘休沐逢花落
病起登臨見客心隔葉流鶯嬌欲歇
上方哀磬晚逾沉
當年金谷追遊地松栢邱陵自古今

病起同家蒼昊王敬哉東湖泛月

伏枕江湖老歲華偶然捨杖入孤槎
壠稔受雨將垂實
水蓼隨波自結花蛩語欲催人緯素
月明忍照我無家

狂呼且酌杯中酒，愁聽姑蘇塞外笳。

張幼量以白門精舍假余感贈

無家日日對江樓，知向誰門挾蒯緱。
欲學灌園宜抱甕，得因下榻反驚鷗。
夢回謝客池邊草，醉臥張融岸上舟。
歎息故園歸未卜，好從芳樹慰淹留。

重過孫丹芝園

零落西園舊草亭，相逢無那眼還青。
一時問訊兼麋鹿，幾載漂搖歎鶴鴒。
對雪一尊紅樹近，懷人千里碧雲停。
北來曠有離羣淚，彈入朱絃不忍聽。

歲杪方爾止過蕪湖官署

伏枕江頭歲欲闌，張燈中霽列辛盤。微官翻受妻孥憎，
老友真如兄弟歡。各有新愁驚慘澹，爲吟長句益悲酸。
最憐同學飄零盡，嗟爾能方管幼安。

酬贈方爾止

蹉跎華髮又新年，老去情親倍可憐。玩世一探龜策傳，
勸予三復馬蹄篇。翻驚處士門如市，誰信爲郎室似懸。
聞道謝家山色好，桃花開日扣魚船。

送王翰明遊白下

高齋獨臥病難勝，況送離人感慨增。楊柳春風江上笛，
梅花疎雨佛前燈。白雲不沒三山影，黃鳥還飛六代陵。

此別憐予憔悴甚天門春色共誰登

趙五絃齋中讌集限郎字

登樓客半是高陽酒政無苛約數章南國山川悲庾信
大江烟雨憶周郎桐餘深影留鶯語月有徽痕試薜香
莫向尊前增感慨漢京聞已諱長揚

獄中長至呈同繫諸公

時大駕
有事南郊

園扉望斷屬車塵聞道鑾輿出禁闈
五夜斗杓初建子孤臣霜鬢未逢辰
雉羅旣說嗟何及龍性誰言不可馴
猶有鍾儀數行淚南冠相對共沾巾

同張孺舍謁獄廟

老檜陰陰鳥夜號入門稽首古臯陶鄒陽書就誰能上
莊舄吟成尚可操多難未堪逢雀角此身雖在愧鴻毛
寸腸真作車輪轉強起爲君引濁醪

庚寅除夕

詎爲窮途淚滿巾辛盤想像轉悲辛消磨萬古還今夜
閱歷多艱剩此身贄棗更誰憐弱女斷慈何處覓慈親
栢觴綵勝無消息不信人間尚有春

元旦

白項烏啼接曙暉條風依約滿圓扉非關潘岳爲郎拙
自是虞翻與世違滄海尚懸逋客淚清霜寧爲賤臣飛

故園鷗鷺應相誚，辜負三春薜荔衣。

立春

春風裊裊入燕關，有客傷心鬢髮班。
夜半繁星回北斗，望中殘雪滿西山。
誰家玉笛能催別，何事金雞未放還。
稍喜堆盤生菜甲，且憑尊酒破愁顏。

送顧勉齋督餉楚中

柳色依依邊馬鳴，故人萬里賦西征。
漢江舊繞褒斜谷，蜀道新懸驃騎營。
積裏梅花春不度，樓中羌笛夜偏清。
相看懷抱蕭條盡，隴水秦雲雁幾聲。

聞郭輝竹赴難志感二首

側身東望獨含愁，尺素俄傳解我憂。
黨禍得無驚范母，故人來必是王修。
欲投豺虎呼蒼昊，肯使錢刀感白頭。
俠骨未妨頻煅煉，老盧扉裏醉鄉遊。

冰雪河梁送汝歸，至今烏鵲尚驚飛。
未辭羽翮懸弓繳，何事風波及釣磯。
梁獄有書愁按劍，秦庭幾客賦無衣。
懸知執手還如夢，顏鬢年年半已非。

送胡湘孫歸虞山

客中送客已霑裳，況送窮交淚數行。
老矣尚憐舟作屋，歸與何處醉爲鄉。
才能玩世真堪隱，我不如卿未敢狂。
欲采芙蓉渺烟水，闔閭城外月蒼蒼。

贈張無念

杵臼論交眼尚青，瓊高臥雨冥冥。蘆中客自哀同病，澤畔人誰解獨醒。各以孤懷酬好月，強將幽恨語流螢。分明行路難如此，爲爾重吟劍閣銘。

王胥庭貽詩次韻荅之

南冠誰肯問鄒陽，半是愁鄉與睡鄉。中散哀歌餘舊譜，大招生弔泣新章。青蠅得意嬌還妒，黃鳥憐人去復翔。芸閣夜歸新月好，知君相憶罷清觴。

不寐

淚痕燭燼共成灰，一葉秋聲萬里哀。無奈曉鐘敲夢斷。

況逢涼雨入窗來，鄭人詎信蕉非鹿。
楚客從教鶴是媒，此夜故園刀尺動。
寄言歸燕爲頻催。

七夕

軋軋宵停織女梭，瓊環髮鬢欲凌波。
流黃機上經年怨，雜綵車中此夜過。
定有鳳凰隨玉管，願爲烏鵲到銀河。
人間無限傷心別，長歎秋風奈老何。

和錢湘靈韻 二首

古道於今半已蕪，數行涕淚感區區。
吹簫幸有蘆中客，溫律空傳稷下儒。
君自南枝悲越鳥，我如東郭泣韓盧。
何時握手銅駝陌，擊筑高歌問酒徒。

橐籥消息苦難通來往詩筒感慨中
北道塵沙枯樹賦南朝霜露景陽鐘
歌成苦葉偏憐屈詔幸甘泉欲薦雄
汝倡子酬慚小謝彩毫委苑落雙虹

哭門人孫石書二首

獵獵悲風掩夜臺孫生真是可憐才
囊中白雪孤兒哭門外青蠅弔客來
泉路此時傷我繫絳帷他日爲誰開
稽康憔悴劉楨死腸斷交遊賦八哀
素髮垂垂半死身支離天地一窮民
何堪燕市園中客更哭山陽笛裏人
歲在龍蛇空有恨賦成鸚鵡定無倫
平生張范深相得知爾泉臺尚結鄰

哭董白岳表兄

山水文章有素期，論交少小得肩隨。
風流入座能吳詠，痛飲銜杯讀楚辭。
此日遺孤勞汝弟，當年慈母是吾姨。
玉樓定屬孫郎草，彩筆雙題碧落碑。

和錢湘靈長至見懷

簷外層冰欲作花，沉沉哀柝夜方賒。
漫勞葭瑄吹愁轉，無奈銀箏感鬢華。
雪後新傳司馬賦，雲間舊識士龍家。
多君未厭南冠客，長向尊前一歎嗟。

和旣庭三首

鹿茸初奏慰蘭陔，閩闔驚傳天馬來。
梁苑雪深堪授簡，

薊門霜老獨登臺風流南國傳宮體翰墨西京見史裁
早晚石渠開秘笈錦袍雙映璧人回

江介聲名紀永嘉德星初聚太邱家吹笙羨汝攀庭樹
長笛慚余隔絳紗遠道有懷遺橘柚羈人無復染琵琶
書來但說加餐飯無郵支離兩鬢華

桑乾環繞古幽州雙闕嵯峨數百秋游俠至今稱趙李
美人重起續曹劉笙歌翠幙驕新客瓜瓞青門有故侯
已著養生憐叔夜欲從滄海問浮邱

次旣庭來韻

知君詞賦擅才華珠樹琅玕數謝家殿內卽傳金鳳紙

洛中爭識白羊車，月明恨隔桓生筓。
歲晏愁聞蔡女笳，況是客懷蕭瑟盡。
久無清夢到梅花。

獄中對月

疎星耿耿逼人寒，清漏丁丁畫角殘。
客淚久從愁外盡，月明猶許醉中看。
棲鳥繞樹冰霜苦，哀雁橫天關塞難。
料得故園今夜夢，隨風應已到長安。

孫孝則中翰書來慰問賦詩卻寄兼懷張公選吏部

千里征輶挽素裳，尺書迢遞自漁陽。
鼎湖龍去髯雙墮，水國鴻歸字幾行。
雨雪誰憐君子繫，春風爲伴舍人裝。

南行若遇浮湘客好折梅花一寄將

錢忞谷初度

嘉平雲物紀深冬上客懸弧此日逢
共向車中看洗馬還因柱下見猶龍
醉歸畫省瓊爲珮雪照金尊玉作峰
極目烟霄天尺五幾時京洛復遊從

將別家兄畱連有賦

驚傳疾病方來止不爲兵戈遽忍歸
大野雲霾兕虎叫晴江沙白鶴鴒飛
瀕行預戒舟車路未去先裁弓箭衣
江水有情應化淚愁看西北是親闈

送趙崑石之永安學博

將隨歸雁到榕城短槳衝波一葉輕海內誰知閔仲叔
閩南今得鄭康成吹殘長笛應裁賦閱盡名山好論兵
斗酒最憐京口路故人涕淚有班荆

送徐子九之任麻城

昭邱南望鬱蒼蒼有客鳴榔過武昌楚國菁茅初入洛
漢臣詞賦舊懷湘月明挂席聞鴻雁秋老登樓見鳳凰
若到江南逢小謝寄言幽夢滿池塘

送劉成之赴官安東

蒹葭淼淼入蒼茫之子褰帷水一方風俗尚懸長孺榻
鄉關遙接蓋公堂清秋秔稻明淮浦落日蛟龍見呂梁

知爾訟庭無宿牘
鮫人問訊說滄桑

寄沈惠孺郡丞

短褐論交得沈侯
登山臨水見風流
還同謝朓來姑孰
曾醉平原過趙州
古驛月明漁笛遠
長淮春盡柳絲柔
歸航多載秦郵酒
共醉君家八咏樓

懷王敬哉

時黃河決
濟兗間

蕭條歲月孰華予
行坐徘徊靡所如
刀俎堪驚身是鹿
雲霄還念食無魚
但畱東海栽桑地
敢作南山種豆書
聞道宣房薪未塞
欲從太史問河渠